

Naqqiut

Ulloq 11. April 2016 ullulerneqarsimasoq taarserpaa. Imarisaata oqaasertai aaqqinneqarput.

”Naalakkersuisut sermimik imermillu avammut nioqquteqalernissamut pilersaarusiaat pillugu nassuiaat 2004-imersoq”-mut malinnaatitsissummik nassuiaammik kingusinnerpaamik UKA2017-imi saqqummiusseqqullugit Naalakkersuisut peqquneqarnissaannik Inatsisartut aaliangiiffisassaattut siunnersuut. (Nalunaarusiarineqartussap takussutississavai siunissami imermik sermimillu nunanut allanut nioqqutissiortalernissamut aporfiusinnaasut aammalu nunarsuarmioqatigiit niuerfissuini niuernerpalaartumik unamminarsinnaasut nalunaarsussallugit. Nalunaarusiap aamma ersersissavaa sermimik imermillu avammut niueruteqarnissamut avungangaaq pilersaarusiaq, imermik avammut niueruteqarnermi maannamut misilittagaalersimasut aallaavigalugit). (Inatsisartunut ilaasortaq Jess Svane, Siumut)

Akissuteqaat

(Vittus Qujaukitsoq, Inuussutissarsiornermut, Suliffeqarnermut, Niuernermut Nunanullu allanut Naalakkersuisoq)

Siullermeerneqarnera

Aallarniutigalugu Inatsisartunut ilaasortaq Jess Svane Inatsisartut aalajangiiffisassaannut siunnersuutisialaanut qutsavigissavara.

Sermermut imermillu periusissiap nutarsarnissaata pingaartuunera Naalakkersuisut isumaqatigaat. Suliaq tamanna Naalakkersuisut suliassaasa ilaattut ingerlanneqareerpoq, 2016-illu naanera sioqqullugu naammassisimassasoq naatsorsuutigineqarpoq.

Sermermut imermillu periusissiamik nutaamik (2016-2019) maannakkut suliap ingerlareersup anguniagaa tassaavoq ineriartortitsineq, suliffeqartitsineq aammalu Kalaallit Nunaannut avammut tuniniaanermi isertitarineqartussat.

Sermerkik imermillu suliassaqarfiup ineriartortinnissaa niuernikkut atugassarisani pissasoq Naalakkersuisut isumaqarput. Inuussutissarsiornermik suliassaqarfik ineriartortinneqassaaq, aammalu Kalaallit Nunaannit namminersortutut suliffeqarfiutilinnik ingerlanneqassalluni, imaluunniit nunanit allanit aningaasaliissuteqartunit aamma nunatsinnit suliffeqarfiit suleqatigalugit ingerlanneqassalluni.

Maannakkut sermermut imermillu inatsisaasoq ingerlatseqatigiiffiit sioqqutsisumik misissuinissat aamma atuinissamik akuersissutit pillugit qinnuteqarsinnaanerannut periarfissiivoq. Aaqqissuussinerup siunertaa tassaavoq tunisassiuilerneq avammullu tuniniaalernissaq sioqqullugu misissuinerit naammassinissaannut ingerlatseqatigiiffiit periarfissinnissaat.

Taamatut aaqqissuussinerup nunatsinit imermik nunarsuarmi niuernissamut tuniuniaalernissaq namminermi piviusunngortissinnaangilaa.

Tamatumunnga patsisaasut ilaat tassaavoq nunarsuarmi niuernermi tunisassianut unammilligassanut naleqqiullugu nunatsinni annertuunik tunisassiornermut assartuinernullu aningaasartuuteqarnerat. Taamaattumik nunatsinnit imermik tunisassianik aningaasaliisarnerit atuinerlu qanoq unammillernerusinnaasumik tunngaveqartinnerullugit pisinnaaneri Naalakkersuisut periusissiaminni nutaami sammisaqarniarput.

Taamaalillutik nunarsuarmi niuernermi imermik tunisassiat ilisimaneqartut arlallit assigeequtigaat tunisassiornikkut annikitsuararsuarmik aningaasartuuteqartuunerat, aammalu tunisassiarisat amerlanerujussuunerat. Tamatuma saniatigut imermik imigassat tunisassiarpassuit ataatsimoortillugit imeruusaatinik niuernermit suliaqartunik angisoorsuarnit, soorlu Nestlé-mik Coca Colamillu pigineqartunit ussasaarutigineqartarput.

Taamaalillutik periusissiamut nutaamut piareersaatitut misissuinerit Naalakkersuisut suliarisimasaat taakkartorpaat Kalaallit Nunaanni pitsaassutsimik eqqortumik annertuunik imermik kuuttoqartarneranik Kalaallit Nunaata sukumiisumik misissueqqissaarinerit aqputigalugit tikkuartuisinnaanera. Aammattaaq misissuinerit uppersassavaat annikitsumik aningaasartuuteqarfiusumik erngup avammut annertuunngorlugi tunisassiarineqarsinnaanera .

Siunertamut tassunga maannakkut sumiissusersuinermit misissuinerit aamma misissueqqissaarinerit arlallit, periusissiami nutaami ilanngunneqartussat suliarineqarput.

Tamakkut saniatigut imaaliiallaanaq annissuinissamut annertuumik imermik imigassamik pilersuisinnaasunik maqitsisarfiissatut sumiiffinni piukkunnartuni arlalinni erngup pitsaasusaaq Naalakkersuisut misissuinerit ingerlappaat.

Saniatigut aamma erngup pitsaassusaaq, erngup annertussusaaq aamma pisariaqartitatut attaveqarfissiornissamut aallarniutitut aningaasartuutissanik naatsorsuinerit pillugit paasissutissanik imalimmik aningaasaliisinaaffittut suliniutissanik piviusunik katalogiornermik misissuinerit inerneqartinneqassasut siunertarineqarpoq. Suliniutissat taakku aningaasaliisuteqarsinnaasunut naleqqiullugu pilersaarinerit atorneqassapput.

Periusissiami ilanngunneqartut allat assartueriaatsinik, innaallagissamut imermullu akinik, akileraaruteqartitsisarnernik, inuussutissarsiorfinnik siuarsaasinnaanerit allarpassuillu sinaakkutissat atugassarisanik neqeroorutaasunik sammisaqassapput.

Kiisalu ukiuni aggettuni pilersaarinermit pilersitsissutaasinnaasunik periusissiaq saqqummiussaqaasaq.

Taamaalillunga Naalakkersuisut aallartisariigaanni periusissiornermit suliarisami nassuiaammi imarisassatut siunnersuutigisat tulluutissasut isumaqarpunga.

Tamanna tunngavigalugu aalajangiiffigisassat siunnersuutip akuersissutiginnissaa Naalakkersuisut innersuussutigissavaat – taamaattorli imermik sermimillu nunanut allanut nioqquteqalernissamut pilersaarusiaq 2016-ip naanera sioqqullugu naammassillugu pilersaarusiormanissaatut iluarsillugu.